

新元史

第三六册

列傳第三十二

新元史卷之一百三十五

賜進士出身日講起居注官翰林院侍讀國史館纂修膠州柯劭忞撰

耶律阿海

禿花忙古帶

禿滿答兒

移刺捏兒

買奴

石抹也先

查刺庫祿滿

石抹明安

咸得卜

石抹孛迭兒

石抹海住

世昌

耶律忒末

天祐

耶律阿海金桓州尹撒八兒之孫尙書奏事官脫迭兒之子也善騎射通諸國語金末使於王汗見太祖姿貌異常因進言金國戎備廢弛俗日侈肆亡可立待帝喜日汝肯臣我以何爲信阿海對曰願以子弟爲質明年

復出使與弟禿花俱往慰勞加厚遂以禿花爲質直宿衛阿海亦留事太祖參預機謀常在左右及王汗來襲太祖與諸將同休戚者飲巴泐渚納水爲盟阿海兄弟皆預焉旣敗王汗金人訝阿海久不反命拘其家屬於瀛州阿海殊不介意帝聞之妻以貴臣之女給戶食其賦從攻西夏諸國累有功太祖卽位勅大將者別略地漠南阿海爲先鋒六年從破烏沙堡八年從拔宣德乘勝次居庸北口阿海奏曰好生乃聖人之大德願止殺掠以應天心帝嘉納焉遂分兵略燕南山東諸路還駐中都近郊金主懼請和太祖諭其使曰阿海妻子何故

拘繫弗遣金人卽歸其妻子九年拜太師行中書省事
從帝攻西域拔布哈爾撒馬爾干等城留監撒馬爾干
未幾以疾卒年七十三至元十年追諡忠武三子長忙
古台次綿思哥次捏兒哥忙古台太祖時佩虎符監戰
左副元帥階金紫光祿大夫管領契丹漢軍守中都招
安水泊等處卒無子捏兒哥佩虎符爲右丞行省遼東
萬奴叛舉家遇害綿思哥襲太師監撒馬爾干城久之
請還內郡改中都路也可達魯花赤佩虎符卒二子買
哥通諸國語太祖時爲奉御賜只孫服襲其父職時供
億活繁屢貸於民買哥悉以私帑償之事聞賜銀萬兩

從憲宗攻蜀師次釣魚山卒於軍妻移刺氏以哀毀卒
特諡貞靜夫人七子知名者曰老哥驢馬老哥歷提刑
按察使入爲中書左丞驢馬備宿衛爲必闡赤遷右衛
親軍都指揮使至元二十四年世祖宴於柳林命驢馬
居其父位次賜以孫服二十五年戊哈丹禿有戰功以
老乞骸骨驢馬七子五臺奴襲父職拔都兒中書右丞
文謙興國路總管卜花早卒蒙古不花荆湖北道宣慰
使虎都不花一名文炳湖州同知萬奴人匠副總管
禿花又譯爲統灰國語質子也帝卽位封千戶與阿海
同親任用事從伐金爲嚮導率劉伯林一軍招降山後

諸州九年金將斫答札刺兒來降太祖命與石抹明安會攻中都又從木華黎收山東河北有功拜太傅總領也可那延封濮國公賜虎符銀印歲給錦幣三百六十匹鎮宣德太宗卽位立漢軍七萬戶以禿花統萬戶札刺兒劉黑馬史天澤伐金卒於西和州子朱哥嗣仍統劉黑馬等諸萬戶與都元帥塔海紺卜伐蜀卒於軍子寶童有疾不任事以朱哥弟買住嗣別授寶童隨路新軍總管買住言於憲宗曰今欲滅宋當先定成都以爲根本帝然之使率諸軍攻嘉定未下而卒以兄百家奴嗣自朱哥至百家奴並襲太傅領也可那延

禿滿答兒百家奴子也常留中宿衛後代百家奴爲成都管軍萬戶至元十一年從忽敦攻嘉定修平康寨以守之十二年從汪田哥攻九頂山嘉定降又從忽敦徇瀘敘諸州圍重慶守合江口又以舟師塞龍門敗其援兵十三年瀘州叛從汪田哥攻之瀘州堅守不下禿滿答兒夜率所部奪其水城黎明遂克瀘州復從圍重慶敗守將張珏於城下重慶降賜虎符授夔州路招討使遷四川東道宣慰使仍兼夔州路招討使改同僉四川等處行樞密院事遷四川行省左丞尙書省立改尙書省左丞進右丞卒

忙古帶寶童子也沈雄有膽略世祖時賜金符襲父職爲隨路新軍總管統領山西兩路新軍從行省也速帶兒征蜀攻拔重慶瀘州俱有功擢萬戶至元二十一年遷雲南都元帥從攻羅必甸詔率所部入緬迎雲南王金齒白衣答奔諸蠻往往伏險要爲刼掠忙古帶奮擊敗之凡十餘戰開金齒道奉王以歸遷副都元帥二十四年從諸王阿台征交趾至白鶴江與交趾昭文王戰奪其戰艦八十七艘又從雲南王攻必甸破之二十九年入覲賜金幣有差成宗卽位擢鎮國上將軍授烏撒烏蒙等處宣慰使兼管軍萬戶遷大理金齒等處宣慰

使都元帥六年烏撒羅羅斯叛雲南行省使忙古帶討平之事聞賜鈔三千貫銀五十兩金鞍轡弓矢以旌其功九年討普安羅雄州叛賊阿填晝夜不解甲一日之間合戰者九擒阿填殺之十年進驃騎衛上將軍遙授雲南諸路行中書省左丞行大理金齒等處宣慰使都元帥十一年卒於大吉州年五十八至大四年贈龍虎衛上將軍平章政事追封濮國公諡威愍子火你赤船橋萬戶達魯花赤旺札拉不花雲南諸路兵馬右副元帥

移刺捏兒契丹人沈毅多謀略金人欲官之辭不受聞

太祖舉兵私謂所親曰爲國復仇此其時矣率其眾百餘人來降且獻伐金十策帝召見與語奇之賜名賽因必闡赤又問生於何地捏兒對曰霸州因號爲霸州元帥太祖十年授兵馬都元帥佐木華黎取北京及張致據錦州叛使捏兒與吾也而脫蘭闡里必合兵討之致平遷龍虎衛上將軍兵馬都提控元帥興州達魯花赤重兒叛復與吾也兒討平之賜金虎符從木華黎圍鳳翔先登手殺數十人左臂中流矢裹創進攻丹延諸州木華黎止之對曰創不至死敢自愛耶木華黎壯之贈以所乘白馬明日介其馬飾以朱纓簡驍騎七十人與

金人戰木華黎登高望之見其馳突萬眾中曰此霸州元帥也金人大敗丹延十餘城皆降遷軍民都達魯花赤都提控元帥兼興勝府尹二十一年從太祖征河西取甘合辛蛇等州復從郡王帶孫攻益都下膠萊淄等州太宗元年卒追贈推忠定力保德功臣開府儀同三司上柱國封定國公諡武毅子買奴

買奴太宗召見問曰汝年小能襲父爵乎對曰臣年雖小國法不小太宗異其對顧左右曰此兒甚肖其父以爲高州等處達魯花赤兼征行萬戶從札剌亦兒台攻高麗花涼城監軍張翼劉拔都隕於敵買奴怒曰兩將

陷賊義不獨生力戰斬其大將一人進攻開州獲守將
金沙密遂下龍宣雲泰等十四城太宗五年從諸王阿
勒赤歹征蒲鮮萬奴有功未幾召還興州趙祚反土豪
楊買驢等埒之仍從阿勒赤歹往討斬賊將董蠻等圍
買驢於險樹塞三月不下買奴令健卒劉五兒循塞北
小徑上大樹縣繩引百人登直前奮擊買驢投崖死餘
黨悉平以功賜金鞍良馬又從唐古征高麗圍王京取
其西京而還賜金鎖甲加鎮國上將軍征東大元帥佩
金符出鎮高麗將行以疾卒年四十贈推誠効義功臣
榮祿大夫平章政事追封興國公諡顯懿買奴子元臣

別名哈刺哈孫年十六入宿衛進止有度世祖謂丞相和禮合孫曰此勲臣子非凡器也以爲怯薛必闇赤襲千戶將其父軍從伐宋攻淮西戍清口取瓜洲下通泰諸州至元十三年預平宋功進階武義將軍中衛親軍總管佩金虎符十四年翁吉刺部只兒瓦台叛圍應昌時皇女魯國公主在圍中元臣帥所部兵馳救擊敗只兒瓦台追執諸魚兒灤公主賜賚甚厚奏請暫留元臣鎮應昌以安反側居一歲召還遷明威將軍後衛親軍副都指揮還鎮又三歲召還加昭勇大將軍十九年世祖以所籍沒權臣阿合馬家婦人賜之辭曰臣家世清

素不敢自污帝嘉歎不已二十二年進昭毅大將軍同
僉江淮行樞密院事院罷歸高州車駕親征乃顏元臣
帥家僮五十人謁行在自請扈駕討賊二十八年移僉
湖廣行樞密院時溪洞施容等州蠻獠作亂元臣親入
敵境諭降其酋魯萬丑三十年卒於官贈安遠功臣龍
虎衛上將軍同知樞密院事追封興國公諡忠靖子迪
中奉大夫湖廣宣慰使都元帥

石抹也先本遼述律氏遼之后族也入金改爲石抹氏
祖庫烈兒誓不食金祿率部落遠徙年九十而卒父脫
羅畢察兒有五子也先其仲子也年十歲從其父問遼

亡事卽憤曰兒能復之及長勇力過人多智略金人徵爲奚部長讓其兄瞻德納而自匿於北野山射狐兔以食聞太祖起朔方卽來降建言北京金根本地先取之則中原可傳檄而定太祖悅命隸木華黎麾下取北京師次高州木華黎使也先率千騎爲先鋒也先曰兵貴出奇何用多爲諜知金新易北京留守將至也先與數騎邀而殺之懷其勅命徑至北京謂守門者曰我新留守也入府中問吏列兵城上何爲吏以邊備對也先命盡撤之曰寇至在我無勞爾輩是夜下令易置其將佐部伍越三日本華黎至也先開門納之得戶十萬八千

兵十萬資糧器械山積降金將寅答虎等四十七人城邑三十有二木華黎以北京抗命城下將屠之也先諫曰降而復屠則未下者人將死守天下何時可定因以其事上聞詔赦之授也先御史大夫領北京達魯花赤時石天應等據興中府也先分兵降之奏以爲興中尹又副脫忽蘭閣里必監張鯨等取燕南未下州縣至平州鯨稱疾不行也先執鯨送行在帝責之鯨對臣實病非敢叛也帝曰今呼汝弟致爲質當活汝鯨諾而宵遁也先追斬之時致已殺使者應其兄矣致伏誅也先籍其私養士萬二千人號黑軍上於朝賜虎符進鎮國上

將軍以御史大夫提控諸路元帥府事後從木華黎攻
蠡州北城先登中礪石卒年四十一子查刺次咸錫博
羅侃

查刺亦善射襲御史大夫領黑軍太祖十四年詔以黑
軍分屯眞定固安太原平陽諸郡及南征盡以黑軍爲
前列敗金將白撒官奴於河北渡河再戰盡殲其衆論
功黑軍爲最太宗五年從國王塔思討萬奴獲之事具
萬奴傳十三年授眞定北京兩路達魯花赤卒年四十
四子庫祿滿

庫祿滿卓犖有大志關弓滿石畫的去百步射之無不